

# Rau To Petrus Imbooda Muuŋ

## 1 Pita

---

**1** <sup>1</sup>You Petrus, mbaŋooŋa to Yesu Krisi. Nambood rau tonene ilat to yam tamtoŋhon to Maaron to aneep arau ndug ndug izi taan suruvu to Pontus, Galesia, Kapadosia, Asia, ve Bitinia. Onoon nepooŋ tiam to taan, yam aneep anim loomba moghon. Eemoghon ndug tiam kat, nene sambam.<sup>a</sup>

<sup>2</sup>Muuŋ kat, Tamaan Maaron isia gham anim le itaghon tau ŋgar toni. Ve ila uraat to Avuvu Patabuaŋ, ye igham gham anim tamtoŋhon toni patabuaŋa. Tauto aazne, ataghon ŋgar to Yesu Krisi, ve Yesu siŋ toni izala poghomim le aŋgalaŋ ila Maaron mata wa.<sup>b</sup>

Poia tiina to Maaron iza tiam, ve igham gham aneep poia kat toman lolomim luuma. Onoon.

### **Maaron igham ghiit tanim paghu wa. Tauto aazne tasaŋan nepooŋ poia to ndug sambam**

<sup>3-4</sup>Iit tapait Tiina toit Yesu Krisi Tama Maaron pa poia toni. Pasa, ye lolo isamin ghiit ve ate waaro iit kat. Aghita. Ye ipamundigin Yesu Krisi pa mateeŋ, ve ila mundigiin to Krisi, iit tagham nepooŋ paghu wa. Tauto izaad pa nepooŋ to taneep mataad iyaryaar le alok, ve aazne taghurghur mataad pa nepooŋ tonowen.<sup>c</sup>

Nepooŋ to isasaŋan ghiit izi ndug sambam, nene poia moghon. Ve irau isami, ma isob ne maau. Inepneep tovene itaghoni taghoni gha ila. Pasa, Maaron tau ingini pait.<sup>d</sup>

<sup>5</sup>Yam to aghur ila to Krisi, Maaron tau tapiri inim sigeu payam. Ve ye pale inŋin gham tovene ila ila le sawa to Mboŋ Muri, ghoru

---

**a** 1:1 Pil 3:20; Hib 11:13+    **b** 1:2 Ro 8:29; 2Tes 2:13    **c** 1:3-4 Yo 3:3; Ep 1:18+; Tit 3:5+  
**d** 1:3-4 Kol 1:5; 2Tim 4:8

ipatoon ulaan toni ivot ighazoon, ve igham mulin gham. Ulaan tonowen, ye igharaata pataghaan wa.<sup>e</sup>

<sup>6</sup>Yam agham ngar pa mbep naol to nasavia di ne, tauto igham gham lolomim poia le poia kat. Onoon, sawa tonene, yam avaat lolomim ipatajan. Pasa, tovaan naol naol tivotvot payam. Eemoghon tovaan tiam tonanan, eta ivot sorok maau. Tisob tivot titaghon Maaron ngar toni. Ve tineep mala maau. Pale tisob.<sup>f</sup>

<sup>7</sup>Sawa to tigharaat gol, tighuri ila yab, lesa yab ighan muuna ighau pani le ingalaan kat. Onoon, tamtoghon tighita gol tighaze nene mbaliin tau. Eemoghon gol irau inep le alok maau. Muri pale ilale. Ve ghurla tiam, nene mbep tiina kat ilib pa gol. Tauto Maaron ipul tovaan pida tivotvot payam, lesa itoov ghurla tiam, ve ighami ingalaan kat animale gol to tighuri ila yab. Ighaze yam ayoon ariana pa badoon patajani, nene ipatoon gham ighaze ghurla tiam, nene mbep tau. Tovenen sawa to Yesu Krisi ipatoon tau ivot ighazoon, nene pale Maaron ipait gham ve izamim inim tiina.<sup>g</sup>

<sup>8</sup>Onoon, yam aghita Krisi pa matamim pa eta sone. Eemoghon aghur ila toni, ve lolomim pani kat. Tauto igham gham lolomim poia le poia kat. Ighaze atoova pa asavia lolomim, pale asavia iza to sa? Mbep eta iraua maau.<sup>h</sup>

<sup>9</sup>Pasa, yam aghur ila to Krisi aghaze ye pale igham mulin gham ve aneep pooli. Ve aazne, aghitghita ghurla tiam anoja pida tivotvot.<sup>i</sup>

### **Muun, yes propeta tisavia uraat to Krisi**

<sup>10-11</sup>Uraat to Krisi ighami pa igham mulin gham, toman poia to Maaron to aazne izaza tiam, yes propeta to tivotia Maaron aliya tisavia muun wa. Eemoghon tighazoon pa saveen todi tonowen pughu maau. Tauto tikaal saveen tonenen ngara, ve tizuaria di tighaze le tiwatag katin pughu: Pale neez o Maaron igham mulin tamtoghon toni? Ve uraat tonowen pale ivot vena? Pasa, Krisi Avuvu to inep ila lolodi, ye ipaghazonan di pa mbep pida ighaze Krisi pale imbaad patajani naol itaghon Maaron ngar toni. Le isob, ghoru iza tiina ivot ighazoon, ve inep toman nguruba tiina izi ndug sambam.<sup>j</sup>

<sup>12</sup>Tovenen Maaron ipaghazonan yes propeta pa ngar toni, ve isaav padi ighaze: Aliya to tisavia, nene injarua sawa todi maau. Saveen todi injarua gham. Tovenen saveen todi tonowen inepneep tovene inim inim le sawa toit, ghoru anoja ivot. Ve aazne, Avuvu Patabuan to Maaron imbaaja sambam ve izi inim, ye ipamundigin yes uraata to Krisi, ve tisavia varu

---

e 1:5 Yo 10:28+, 17:11+; Jud 1:1 f 1:6 Mt 5:12; 2Kor 4:17; 1Pe 5:10 g 1:7 Mbo 66:10+; Yems 1:3 h 1:8 Yo 20:29; 2Kor 5:7 i 1:9 Ro 6:22 j 1:10-11 Mbo 22; Is 53; Mt 13:17+; Lu 24:26+

poia payam ve alooŋa wa. Ŋgar popoia to tisavia di payam, yes aŋela paam tighaze le tiwatag di, ghoru poia.<sup>k</sup>

### Iit irau tataghon ŋgar patabuaŋ

<sup>13</sup>Tovenen agharaat ŋgar tiam ve aŋgin taumim pooli. Ve aghur ila to Maaron ariana, ve aghur matamim pa poia toni to pale iza tiam. Sawa to Yesu Kriŋi imuul inim ve Maaron ipatoŋa ivot ighazoŋ, nene pale poia toni tonowen ivot ighazoŋ.<sup>l</sup>

<sup>14</sup>Muun, yam akankaan pa Maaron, ve lolomim igham pa ŋgar samsamia naol to taan. Eemoghon aazne, Maaron igham gham anim ye tau ndinatu, ve aghaze ataghon ŋgar toni. Tovenen apul ŋgar to lolomim muŋgina igham pooz payam muul malep.<sup>m</sup>

<sup>15</sup>Pasa, Maaron to ipoi gham anim le, ye patabuaŋ. Tovenen yam irau ataghon ŋgar raraate inimale ival tiina to taan maau. Laghoŋ tiam, yam irau ataghon ŋgar patabuaŋ moghon animale ye tau. <sup>16</sup>Saveeŋa timbooda pataghaaŋ tovene: *“You patabuaŋ. Tovenen yam paam irau ataghon ŋgar patabuaŋ animale you.”*<sup>n</sup>

<sup>17</sup>Maaron to yam asuŋsuŋ pani ve awatwaata aghaze Tamamim, ye ivool to tamtoghon eta maau. Sawa to ighaze ingabiiz ghiit ve ighur atia pait, ye ighur atia pa iit tamtoghon tasob itaghon ŋgar to iit eŋaeŋa taghami. Tovenen sawa tuku to aneep izi taan, yam irau amatughez pani ve ataghon ŋgar toni. Pasa, yam awatag: Taan tonene, nene ndug tiam kat maau. Nene aneep anim loomba moghon.<sup>o</sup>

### Maaron ighol atia to sosor toit pa Kriŋi siŋ toni

<sup>18</sup>Yam awatag: Ŋgar naol to agham di ila to nditimumim, nanan ledi anoŋa poia eta maau. Muun, yam ataghon ŋgar tonanan le awaghamgham. Eemoghon aazne, Maaron ighol sosor tiam atia, tauto ipas gham avot pa ŋgar tonanan, ve igham gham anim le wa. Mbeb to ye ipuli pa ighol sosor tiam atia, nene irau isami inimale gol ve silva maau.<sup>p</sup>

<sup>19</sup>Mbeb tonowen, nene Kriŋi tau siŋ toni to ilib pa mbaliŋ to naol ne. Ye, tirabi imaat inimale sipsip natu to poia le poia kat. Babaŋa eta isami maau.<sup>q</sup>

<sup>20</sup>Muun kat, sawa to Maaron ighur sambam ve taan sone, ŋgar toni ineeŋ pataghaaŋ wa ighaze imbaaŋ Kriŋi inim, leso igham mulin ghiit. Maaron ighaze iuul gham. Tauto sawa paghu tonene to ye ighaze ipasob uraat

---

**k** 1:12 Mbaŋ 2:2+; Ep 3:8+    **l** 1:13 Lu 12:35, 21:34; 1Tes 5:6+    **m** 1:14 Ro 12:2; Ga 5:16+; Ep 2:3, 4:17+    **n** 1:16 Wkp 11:44+; 2Kor 7:1; Hib 12:14    **o** 1:17 Ro 2:11; Pil 2:12, 3:20; Hib 11:13+    **p** 1:18 1Kor 6:20    **q** 1:19 Igham 12:5; Yo 1:29+; 1Kor 5:7; Syg 5:9

toni, ye imbaaŋ Krisi inim ve ipatoonj tau ivot ighazoonj ila tamtoghon matadi.<sup>r</sup>

<sup>21</sup>Muri, Krisi imaat ve Maaron ipamundigini pa mateeŋ, ve ighami imuul iza ila pa sambam, ve igham Krisi iza ivot inim tiina le tiina kat. Ve aazne, Krisi ipamundigin gham ve aghur ila to Maaron, tauto aghurghur matamim pa sawa to ye igham mulin gham ve aneeŋ pooi.<sup>s</sup>

### Taghur lolood pa toŋvetaz toit to Krisi

<sup>22</sup>Aazne, yam aghur ila saveeŋ onoon to varu poia ve ataghoni, tauto anŋalaan ila Maaron mata wa. Tovenen lolomim pa toŋvetaz tiam to Krisi ve aghamgham poian di. Eemoghon yam irau azuaria gham le aghur lolomim padi kat.<sup>t</sup>

<sup>23</sup>Pasa, Maaron ivazog saveeŋ toni ila lolomim inimale aniin uve poia, ve saveeŋ tonanan itoor gham anim paghu wa. Saveeŋ toni irau isami, ma isob ne maau. Pasa, nene Maaron tau aliŋa mata yaryaara to pale ineeŋ tovene itaghoni taghoni gha ila.<sup>u</sup>

<sup>24</sup>Saveeŋa timbooda pataghaanj tovene:

“Tamtoghon to taan, tisob timatmaat rikrikia tinimale kikiliin.

Ve mbeb naol to tamtoghon tighamgham izadi padi, nene tinimale kananaŋ rungu to timalai rikrikia ve titaptap.

Kikiliin imatmaat, ve kananaŋ rungu titaptap.

<sup>25</sup> Eemoghon ŋgeu Tiina aliŋa, nene inepneep tovene irau sawa isob.”<sup>v</sup>  
Saveeŋ tonowen, nene varu poia to tivotia payam.<sup>w</sup>

### Iit irau lolood pa loŋaanj Maaron saveeŋ toni

**2** <sup>1</sup>Tovenen ŋgar samsamia ve ŋgar kaarom to naol ne, yam apul di tisob tineepledi. Ve aparim taumim pa ghurla tiam malep. Yam irau aghur ila kat toman lolomim. Nditamim to ledi mbeb katindi, yam aghur koi padi malep. Ve anin avomim pa nditamim malep.<sup>x</sup>

<sup>2</sup>Saveeŋ to Maaron, nene inŋgalaanj moghon. ŋgar samia eta ineeŋ ila lolo maau. Ve ipalot gham pa nepoonj to anunumim inimale tuz to ndipain tighuni. Tovenen yam aghaze le alonŋloona irau sawa isob, inimale ndipain to ŋgaramus tipoop di ne lolodi pa tighun tuz. Leso ipatubun ŋgar to Krisi inim tiina ila lolomim, ve sawa to Mboŋ Muri, Maaron pale igham mulin gham ve aneeŋ pooi. <sup>3</sup>Tovenen saveeŋ to Tiina toit, akisi tunja. Pasa poia toni, taumim atoova ve ayamaana wa.<sup>y</sup>

### Krisi tamtoghon toni tinim rumai to Maaron Avuvu

<sup>4</sup>Krisi, ye inimale yaam mata yaryaara to ikis rumai to Maaron iyoon ariana. Tovenen yam anarua ala. Onoon, tamtoghon tivelegi tighaze ye

---

r 1:20 Ga 4:4; Kol 1:26; Hib 9:26 s 1:21 Mbaŋ 2:24; Pil 2:9 t 1:22 Yo 13:34+; Ro 12:9+; 1Tim 1:5; 1Yo 3:18 u 1:23 Lu 8:4+; Yo 1:13; Yems 1:18 v 1:25 Mbo 103:15, 119:89 w 1:25 Mt 5:18, 24:35 x 2:1 Ep 4:25; Kol 3:8+; Hib 12:1 y 2:3 Mbo 34:8

tamtoghon sorok, ve tizuruni. Eemoghon Maaron tau ighuri pa uraat toni, ve lolo pani kat. Ye ighita Krisi inimale yaam poiawaat to atia tiina kat.  
<sup>5</sup>Yam to aneep ila lupuuŋ to Krisi lolo ne paam, yam animale yaam matadi yaryaara to Maaron ireirei rumai toni padi, lesu tau Avuvu ineeŋ ilooŋ ila. Ve yam anim ndiran patabuaŋa to watoonrau, lesu ambees pa Maaron. Ve Avuvu Patabuaŋ ipamundigin gham, tauto asuŋsuŋ pa Maaron ve apapaiti, ve aghamgham uraat ve ŋgar popoia naol. Ila uraat to Krisi, ŋgar tiam naol tonanan tinim watoonrau popoiadi ila Maaron mata.<sup>z</sup>

<sup>6</sup>Saveeŋa timbooda pataghaaŋ tovene:

“Aghita. You pale naghur yaam eez ineeŋ izi lolooz Zion. Yaam tonowen, poiawaat kat ve atia tiina. Taug naghuri pa ipariaaŋ rumai tiou.

Tamtoghon tisob to tighur ila toni, nene pale tighita anoŋa to ghurla todi. Eta irau ighur mata pani sorok ve maya ne maau.”<sup>a</sup>

<sup>7</sup>Yam to aghur ila, aghita Krisi inimale yaam poiawaat eez to atia tiina kat. Ve yes to tighur ila maau ne, Maaron aliŋa waaro ru, nene deŋia kat padi:

“Yaam to yes to reiŋ ruum matadi velegini ve tipiyaava ilale, tauto tighuri inim pughu pa ruum ve ipaloti. Lesu ruum iyoon arianaŋ izala pogho.”<sup>b</sup>

<sup>8</sup> Yaam tonowen, tamtoghon pida pale titut aghedi ila, ve titap tizi. Ve pida tighita ve tirere pani. Tauto igham di titap.”<sup>c</sup>

Yes titap pasa, tizoor Maaron aliŋa. Ŋgar todi tonowen, Maaron ighuri padi pataghaaŋ wa.<sup>d</sup>

**Maaron tamtoghon toni tinim ndiran to watoonrau to timbees pa kinik tiina**

<sup>9</sup>Eemoghon yam, Maaron isia gham anim le, ve igham gham anim lupuuŋ ee moghon wa. Yam ndiran to watoonrau to ambees pa kinik tiina. Ve yam tamtoghon patabuaŋa to Maaron. Ye ipoi gham ve apul ŋgar to ndoroom, ve alooŋ ala ghazooŋa toni lolo, lesu avotia ŋgar popoia naol naol to ye ighamgham di payam. Ghazooŋa tonowen, poia le poia kat. Ighaze tagham ŋgar pani, nene pale ŋgar toit iraua maau.<sup>e</sup>

<sup>10</sup>Muuŋ, yam aneep ilooŋ ila lupuuŋ to Maaron maau. Ve aazne, yam anim tamtoghon toni patabuaŋa. Muuŋ, ye lolo isamin gham maau. Ve aazne, lolo isamin gham ve ireu sosor tiam wa.<sup>f</sup>

**Tagham ŋgar to deŋia moghon ila tamtoghon matadi**

<sup>11</sup>Yam ndiran tiou, lolog payam kat. Aghita: Taan tonene, ndug tiam maau. Yam aneep anim loomba moghon. Pasa, ndug tiam kat,

---

z 2:5 Ro 12:1; 1Kor 3:16; Ep 2:21+; Syg 1:6 a 2:6 Is 28:16; Ro 9:33 b 2:7 Mbo 118:22; Mt 21:42 c 2:8 Is 8:14 d 2:8 Lu 2:34, 20:18 e 2:9 Igham 19:5+; Kol 1:13; Syg 5:10 f 2:10 Ro 9:25+

nene sambam. Tovenen naghaze napalot gham: Iŋgar samsamia naol to lolomim igham padi, yam apul di tineepledi. Nene nasavia ŋgar to lolomim muŋgina to tipaparab toman ŋgar to anunuud.<sup>g</sup>

<sup>12</sup>Yam irau agham ŋgar denja moghon ila yes to tiwatag Maaron maau ne matadi. Onoon, aazne, tiŋgal saveeŋ naol payam tighaze yam ndiran to ghamuŋ ŋgar samsamia. Eemoghon ighaze tighita gham ataghon ŋgar poia, nene pale igham di titoor ŋgar todi. Leso sawa to Maaron inim ve ighur atia pa tamtoghon, yes paam pale tipait iza pa tapiri ve poia toni.<sup>h</sup>

### **Taneep ila daba toit sambadi ve talooŋ aliŋadi**

*(Ro 13:1-7; Ep 5:22-6:9; Kol 3:18-4:1)*

<sup>13</sup>Yam anim Tiina toit Yesu Krisi le wa. Tovenen tamtoghon tisob to tighur di tinim daba pait, yam irau aneep ila sambadi ve alooŋ saveeŋ todi. Tovenen aneep ila kinik to Rom to iza tiina kat ne samba.<sup>i</sup>

<sup>14</sup>Ve daba pida to tiŋgin ndug ne paam, azoor di malep. Aneep ila sambadi ve alooŋ saveeŋ todi. Pasa, yam awatag: Kinik ighur di, lesu tighur atia pa ndiran samsamiadi ve titatan di, ve tipakur yes to titaghon ŋgar poia. <sup>15</sup>Tovenen Maaron ighaze yam agham ŋgar poia moghon. Leso apoon yes kankanooŋa to tiŋgal saveeŋ pait ne avodi, ve tipul saveeŋ todi tonowen ineep. Ndiran tonowen saveeŋ todi inimale saveeŋ to borouŋa.<sup>j</sup>

<sup>16</sup>Onoon, ila uraat to Krisi, yam anim mbesooŋa muul maau. Eemoghon agham ŋgar aghaze: “Aazne, you nanŋin taug. Tovenen sa ŋgar to naghaze naghami, nene irau naghami.” Venen malep. Pasa, ighaze agham ŋgar tovene, nene pale inim pughu payam pa agham sosor. Yam irau ataghon ŋgar to ipatoŋ gham ighaze yam mbesooŋa to Maaron.<sup>k</sup>

<sup>17</sup>Tovenen matamim izi pa tamtoghon eta malep. Ighaze tamtoghon ledi izadi, ma ledi izadi maau, yam agham ŋgar poia moghon padi. Ve lolomim pa toŋvetaz tiam to Krisi ve agham poian di, amatughez pa Maaron ve ataghon ŋgar toni, ve atandag pa kinik.

### **Saveeŋ iŋarua yes mbesooŋa**

*(Ep 6:5-8; Kol 3:22-25)*

<sup>18</sup>Yo, you leg saveeŋ ris pa yam mbesooŋa. Yam irau atatan taumim, aneep ila daba tiam sambadi, ve atandag padi. Yes to tigham poian gham ve tipatoŋ ŋgar poia payam, ve yes to tigham ariana payam ne paam.<sup>l</sup>

<sup>19</sup>Onoon, ighaze matamim iŋgal Maaron ve ataghon ŋgar toni, ve tamtoghon tighur pataŋani payam, nene denja maau. Eemoghon ighaze

---

**g 2:11** Ro 13:14; Ga 5:16+; Pil 3:20; Hib 11:13+    **h 2:12** Mt 5:16; Ro 12:17; 2Kor 8:21; Pil 2:15    **i 2:13** Mt 22:21; Tit 3:1    **j 2:15** Tit 2:8    **k 2:16** Ga 5:1,13    **l 2:18** 1Tim 6:1+; Tit 2:9+

ayoon ariana pa badoon patajani tonanan, nene pale Maaron lolo poia payam, ve ipakur gham. <sup>20</sup>Eemoghon ighaze yam agham ngar samia ve tilos gham, ve abaad patajani tonenen, nene pale sei ipait gham? Maau. Ve ighaze ambaad patajani pa taghoniin ngar denja, nene pale Maaron lolo poia payam, ve ipakur gham.<sup>m</sup>

### Tayoon ariana pa badoon patajani, lesu tataghon Yesu aghe muri

<sup>21</sup>Maaron ipoi gham anim le, lesu ataghon ngar tovene. Aghita. Krisi imbaad patajani tiina kat pa iuul gham. Ye ipatoon gham pa ngar toni tonowen, lesu aghita ve ataghon aghe muri.<sup>n</sup>

<sup>22</sup>“Ye igham sosor eta maau, ve saveen kaarom eta ivot ila avo maau.”<sup>o</sup>

<sup>23</sup>Ve sawa to tipiyaav saveen velegiin pani, ye ipamuul saveen todi maau. Neneena moghon. Ve sawa to tighur yabyabuun pani, ye isavia saveen eta pa ipamatughezan di maau. Ye inumeer Maaron, ve ipul tau ila ye nima. Pasa, ye iwatag: Gabizoon to Maaron, nene denja moghon.<sup>p</sup>

<sup>24</sup>Sawa to Krisi imbaad sosor toit atia izala ai pambaroon, ye iyamaan yabyabuun tiina kat ila tini. Lesu tasob pa ghamuun ngar samia, ve taneep poia ila toni, ve tataghon ngar denja moghon. Tovenen sip to ineep ila Krisi tini, tauto igharaat gham poiamim wa.<sup>q</sup>

<sup>25</sup>Muun, yam aneep animale sipsip to tisagsag. Ve aazne, amuul anim to Ijginiin tiam Krisi wa. Ye Ijgeu to mata pa anunumim irau sawa isob.<sup>r</sup>

### Saveen injarua yes vaivaija

**3** <sup>1-2</sup>Yam ndiliva vaivaija paam, you nasaav payam tovene. Atatan taumim ve aneep ila ndizwamim sambadi. Ighaze todi pida tizorzoor Maaron aliya, yamna awazoran gham malep. Apul saveen padi. Pasa, ighaze tighita gham atandag padi, ve amatughez pa Maaron ve ataghon ngar toni, ve agham ngar ngalaana moghon, nene pale ngar tiam tonanan ighereb di tila to Krisi. Lesu yes paam tighur ila toni ve tinim le.<sup>s</sup>

<sup>3</sup>Ataam naol to tagharaat tauud lesu paghunaad ila tamtoghon matadi inimale tapirai dabaad raua, ma tatiik ghiit pa mbeb milmilia, ma tandud ghiit pa nonogiina popoiadi to atiadi tintina, yam ndiliva agham ngar tiina pani malep. Pasa, nene mbeb sorok to potla moghon. <sup>4</sup>Yam irau azuarua gham pa tikoon tau. Nene ngar popoia to Maaron to ineep ila lolood. Ighaze yam ndiliva atatan taumim ve ataghon ngar luuma, ghoru ngar tiam tonanan pale inim tikoon tau payam. Tikoon tovene irau isami maau. Pale ineep itaghoni taghoni gha ila. Ve ila Maaron mata, nene mbeb tiina ve mbeb tau.<sup>t</sup>

**m 2:20** 1Pe 3:14,17, 4:14+    **n 2:21** Mt 16:24; Yo 13:15; 1Yo 2:6    **o 2:22** Is 53:9; 2Kor 5:21; Hib 4:15    **p 2:23** Mk 15:4+; Ro 12:19; 1Tes 5:15; 1Pe 3:9    **q 2:24** Is 53:5; Ro 6:10+  
**r 2:25** Is 53:6; Yo 10:14; Hib 13:20    **s 3:1-2** 1Kor 7:14+; Kol 3:18; Tit 2:5  
**t 3:4** 1Tim 2:9+

<sup>5</sup>Muun, yes ndiliva patabuanja to tighurghur matadi pa Maaron, tigharaat taudi tovene. Yes titatan taudi ve tineep ila ndizwadi sambadi. <sup>6</sup>Inimale Sara. Ye ilonjloonj azuwa Abaram aliŋa, ve ipoi i ghaze ‘tiina toni.’ Ighaze yam ndiliva agham njar poia, ve amatughez maau ve anumeer Maaron, nene pale ataghon Sara njar toni, ve aneep animale ye ndinatu liva.

<sup>7</sup>Ve yam vaivaija nditamoot paam. Matamim izi pa ndizwamim malep. Nepoonj tiam toman di, matamim iŋgal di, ve agham poian di. Pasa, yam awatag: Yes tapiridi tintina maau. Ve Maaron ighaze ipatoonj poia toni padi, lesa tigham nepoonj poia ila toni tinimale yam. Tovenen ighaze agham samin di, nene pale Maaron ipoon taliŋa pa sunjuunj tiam.<sup>u</sup>

### **Talup ghiit tanim ee moghon, ve tagham poian tamtoghon**

<sup>8</sup>Yo, nasavia saveeŋ tonene, ve isob. Yam asob alup lolomim ve njar tiam inim ee moghon. Ighaze tamtoghon eta lolo ipataŋan, ghorololomim ipataŋan tomani. Ve ighaze lolo poia, ghorololomim poia tomani. Lolomim pa tojvetaz tiam to Kriŋi ve agham poian di. Ve lolomim isamin tamtoghon ve auul di. Ve agham pa izamim malep. Yam irau atatan taumim.<sup>v</sup>

<sup>9</sup>Ighaze tamtoghon tigham samin gham, ayati malep. Ve ighaze tipiyaav saveeŋ samia payam ve tiveleg gham, yam apamuul saveeŋ todi malep. Yam irau agham poian di, ve aghason Maaron pa ighur poia toni iza todi. Pasa, ye ipoi gham anim le, lesa ataghon njar tovene. Ighaze agham tovene, nene pale poia toni iza tiam paam.<sup>w</sup>

<sup>10</sup>Pasa, Maaron isaav tovene:

“Ighaze tamtoghon eta lolo pa nepoonj poia ve ighaze ighita sawa poia ve ineep toman tini iza, ye irau iŋgin poian avo. Lesa saveeŋ samia, ma kaarom eta ivot ila avo sob.

<sup>11</sup> Ve ye irau ipul muri pa njar samia, ve igham njar poia moghon. Ve izuarua tau pa njar luuma, ve ikaal ataam pa yesŋa tamtoghon tisob tilup di tinim ee moghon ve tineep pooi.

<sup>12</sup> Pasa, ŋgeu Tiina mata pa tamtoghon denjadi, ve ighurghur taliŋa pa sunjuunj todi.

Eemoghon yes to tighamgham njar samia, ye mata ighaughau padi ve ighur koi padi.”<sup>x</sup>

### **Saveeŋ iŋarua yes to timbaad pataŋani pa Kriŋi iza**

<sup>13</sup>Ighaze yam azuarua gham pa ghamuunj njar poia, sei pale irau iwaghamun gham? Maau.<sup>y z</sup>

---

**u 3:7** Ep 5:25; Kol 3:19 **v 3:8** Lu 6:36; Ro 12:10,16; Pil 2:2+ **w 3:9** Mt 5:44; Ro 12:14; 1Tes 5:15 **x 3:12** Mbo 34:12+ **y 3:13** Onoon, tamtoghon irau tiwaghamun iit tamtoghon to Kriŋi anojaad. Eemoghon irau tiwaghamun anunuud maau. Pasa, Maaron iŋgin ghiit. **z 3:13** Mt 10:28; Ro 8:31,35+



<sup>14</sup>Eemoghon ighaze ataghon ngar denja ve ambaad patajani pani, lolomim poia. Pasa, poia to Maaron pale iza tiam. Tovenen ighaze tamtoghon tigham ngar eta pa tipamatughezan gham, yam amatughez ve agham ngar naol malep.<sup>a</sup>

<sup>15</sup>Yam irau aghur Krisi inim Tiina tiam ila lolomim ve apatab pani.

Sawa isob, agharaat ngar tiam pooli. Ighaze tamtoghon tighason gham pa ghurla tiam, yam irau apamuul ghasoniij todi, ve apaghazonan di pa pughu to aghurghur matamim pa sawa to Krisi igham mulin gham.<sup>b</sup>

<sup>16</sup>Ve alooj. Sawa to yam apamuul ghasoniij todi, matamim izi padi malep. Asavia saveej luuma ve saveej poia moghon padi. Aazne, tamtoghon tiyou avodi payam ve tiwaghamun izamim pasa, yam anim Krisi le, ve ataghon ngar poia. Tovenen laghoonj tiam, yam irau ataghon ngar to awatagi aghaze nene ingalaan moghon ila Maaron mata. Leso koiamimja tonowen tighita ngar poia to aghami, ve mayadi.<sup>c</sup>

<sup>17</sup>Tovenen ighaze Maaron lolo pa tambaad patajani pa ngar poia to taghami, nene poia. Tayok pani moghon. Eemoghon ighaze tagham ngar samia ve tambaad patajani pani, nene poia maau<sup>d</sup>

**Krisi, ye ngeu denja. Eemoghon imbaad patajani,  
leso igham ghiit tala to Maaron**

<sup>18</sup>Agham ngar pa Krisi. Ye ngeu denja kat. Eemoghon igham iit tamtoghon samsamiad inaad, ve iyamaan yabyabuuj ila tini ve imaat, leso ireu sosor toit ve igham ghiit tala to Maaron. Uraat tonowen, ye ighami pa ee moghon, ve isob. Irau ighami muul maau. Ve Maaron Avuvu ipamundigini pa mateej, ve aazne ye ineeq mata iyaryaar izi sambam.

<sup>19</sup>Sawa to imundig pa mateej, ye ila ivotia Maaron aliqa pa avuvu samsamiadi to tighur di tilooj tila ruum to yabyabuuj lolo.<sup>e f</sup>

<sup>20</sup>Muuj, sawa to Noa, avuvu samsamiadi tonowen tizoor Maaron aliqa. Eemoghon ye ighur atia padi rikia maau. Ye isaan Noa le ipasob uraat to ghuzuuj waan, ghoru ighur atia padi. Yes to tilooj tila waan lolo, ival maau. Yes liim ve tol moghon. Ve sawa to ya ivon toman tapiri, Maaron iuul di ve tineep pooli.<sup>g</sup>

<sup>21</sup>Ya tonowen, nene inimale ngar to ghamuuj ya to aazne igham mulin gham. Nene nasavia ngar to tirughuuz ghiit ve muun ighau pa tiniid ne maau. Pasa, mbep tiina kat to ghamuuj ya, nene vene: Iit

---

**a 3:14** Mt 5:10; 1Pe 2:20, 4:14   **b 3:15** Kol 4:6   **c 3:16** Tit 2:8; 1Pe 2:12   **d 3:17** 1Pe 2:20  
**e 3:19** Saveej waaro tonene pughu ighazonj kat maau. Eemoghon ndiran ngara pida tighaze saveej tonene pughu, nene vene: Sawa to Noa, yes aqela samsamiadi to titaghon Sadan, tigham didiaanj kat, ve tipazaagh tamtoghon pa ghamuuj ngar samsamia naol. Tovenen Maaron izurun di tila tineep izi ndug eez. Leso tisaan sawa to ye ighur katin atia padi. Sawa to Krisi imaat, ye ila to yes aqela samsamiadi tonowen, ve ivotia saveej padi ighaze ye ilib padi wa.   **f 3:19** Ro 5:6; Hib 9:26; 1Pe 4:6   **g 3:20** Mbnp 6:5–7:24

taghason Maaron pa igham ghiit tangalaan̄ ila mata, ve tambua saveen̄ pa tataghon ngar toni. Ŋgar tovene irau igham mulin gham pasa, Maaron ipamundigin Yesu Krisi pa mateen̄ wa.<sup>h</sup>

<sup>22</sup>Ve ye iza ila sambam, ve aazne ineēp ila Maaron nima waan. Tauto an̄jela toman avuvu naol to izadi ve tapiridi tintina, tisob tineep̄ ila ye samba.<sup>i</sup>

### Ŋgar to tamtoghon to Krisi igham di tinim paghu

**4** <sup>1-2</sup>Tovenen sawa to Krisi ineēp izi taan, ye imbaad patañani ve iyamaan yabyabuun̄ ila tini, leso iuul ghiit. Yam tovene paam. Agharaat gham ve asañan̄ pa badoon̄ patañani. Leso ataghon ngar to Krisi tonowen. Pasa, tamtoghon to ighaze imbaad patañani pa Krisi iza ve iyamaan yabyabuun̄ ila tini, ye isob pa ngar samia wa. Tovenen sawa to ye ineēp izi taan, ngar to lolo muñgina irau igham pooz pani muul maau. Ye pale itaghon Maaron lolo.<sup>j</sup>

<sup>3</sup>Ŋgar samsamia naol to yes kankanooñja lolodi igham padi, yam agham di iraua. Aghita. Muun̄, lolomim ipazaagh gham pa ghamuun̄ ngar samsamia naol. Sawa tonenen, matamim samia animale ngavuun̄, ve aghunghun le awaghamgham, aluplup gham pa ghanghaniin̄ ve ghunghunuun̄ toman oroor tiina, ve ambesmbes pa maaron kaaromñja to tutuun̄ to Maaron ingalsekin ghiit padi.<sup>k</sup>

<sup>4</sup>Ve aazne, nditamim tighita gham ve tigham ngar naol. Pasa, yam ala toman di ve yamñja alup gham pa ghamuun̄ ngar samsamia naol tonowen muul maau. Tauto tipiyaav saveen̄ samsamia naol payam, ve tiveleg gham. <sup>5</sup>Eemoghon muri, yes pale tiyoon̄ ila Ŋgeu Tiina mata, ve tivotia ngar to tighami izi taan ne pani. Ye igharaat tau, ve isasañan̄ sawa to ingabiiz tamtoghon tisob ve ighur atia padi. Yes to tineep̄ matadi iyaryaar, ve yes mateen̄ja paam.<sup>l</sup>

<sup>6</sup>Maaron ighaze tamtoghon toni tineep̄ matadi iyaryaar tinimale ye tau. Pughu tonene to tamtoghon toni to timaat wa, sawa to tineep̄ matadi iyaryaar, tiloon̄ varu poia.<sup>m</sup>

Yes timaat pasa, tamtoghon tisob to taan to tigham sosor, Maaron ighur atia padi. Eemoghon ila uraat to Avuvu Patabuan̄, aazne anunudi tineep̄ matadi iyaryaar.<sup>n</sup>

---

**h 3:21** Tit 3:5; Hib 10:22 **i 3:22** Mbo 110:1; Mk 16:19; Ep 1:20+ **j 4:1-2** Ro 6:2+; 2Kor 5:15; Ga 5:24; 1Pe 2:21 **k 4:3** Ro 13:12+; Ep 4:20+ **l 4:5** Mban̄ 10:42; 2Tim 4:1; Yems 5:9 **m 4:6** Ataam to muun̄ Maaron tamtoghon toni tiloon̄ varu poia, nene saveen̄ mbuaan̄ toni katindi to tisavia Mesia. Yes to tighur ila saveen̄ mbuaan̄ tonowen, Maaron ighita di ighaze yes tighur ila to Mesia. Ve ila ghurla todi tonowen, ye ighita di ighaze tineep̄ denjadi ila mata. Tovenen sawa to timaat, ye igham anunudi tineep̄ matadi iyaryaar. Ve aazne, Mesia izi inim taan wa. Tovenen sei to ighaze ighur ila to Krisi, ve imaat, Maaron pale igham anunu ineēp mata iyaryaar paam. **n 4:6** Ro 6:23, 8:10; 1Pe 3:19

**Tagharaat tauud ve tagham uraat to Maaron ighuri inim nimaad**

<sup>7</sup>Aazne, sawa to mbef tisob tilaledi, nene inim igharau wa. Tovenen agham ngar pooi, ve anging taumim pooi. Leso iuul gham pa sunjuuŋ tiam.<sup>o</sup>

<sup>8</sup>Ve mbef tiina to ilib pa mbef tisob, nene ngar to lolood pa tauud. Tovenen azuaria gham le ataghon katin ngar tonene. Pasa, ngar to lolood pa tauud, nene igham ghiit tapul sosor naol to tamtoghon tigham pait, ve lolood imaagh padi.<sup>p</sup>

<sup>9</sup>Ŋgar to ghamuuŋ poian loomba irau ineeŋ ariana ila lolomim. Ayasiil pani malep.<sup>q</sup>

<sup>10</sup>Maaron ireirei uraat ve ngar popoia naol naol pait itaghon tau poia toni. Tovenen sa uraat ma ngar to ye ireii payam, anging poiani ve agham anoŋa toni ivot. Leso awaulan gham, ve anim mbesooŋa popoia to Maaron.<sup>r</sup>

<sup>11</sup>Tovenen ighaze ngeu eta le uraat pa ivotia Maaron aliŋa pa tamtoghon, ye isaav itaghon tau ngar toni malep. Isaav inimale Maaron tau isavsaav ila avo. Ve ighaze tamtoghon eta le uraat pa iuul tamtoghon, ye irau igham tapiri ila to Maaron ve igham uraat tonenen. Ighaze yam agham tovene, nene pale ngar tiam isob igham tamtoghon tipait Maaron pa tapiri ve poia toni ila Yesu Kriŋi iza.

Tapakur Kriŋi iza ve tapaiti pa tapiri, to aazne ve itaghoni taghoni gha ila. Onoon.

**Ighaze tambaad pataŋani pa Kriŋi iza tagham ngar naol malep**

<sup>12</sup>Yam ndiran tiou, lolog payam kat. Onoon aazne, pataŋani tiina kat itoov ghurla tiam, ve ayamaana inimale yab ighan gham. Eemoghon pataŋani to ivot payam ne, ruŋamim iza pani ve agham ngar naol aghaze nene pataŋani ite kat ne malep. Pasa, pataŋani tovene igham Maaron tamtoghon toni katindi wa.<sup>s</sup>

<sup>13</sup>Lolomim poia. Pasa, aazne, yam alup toman Kriŋi ve ambaad pataŋani inimale muuŋ ye imbaada. Tovenen ayoon ariana. Leso sawa to Kriŋi ipatoon tapiri ve iza tiina ivot ighazoon, ye pale igham gham lolomim poia le poia kat.<sup>t</sup>

<sup>14</sup>Tovenen ighaze yam avotia Kriŋi iza ve ataghon ngar toni, ve tamtoghon tipiŋaav saveeŋ samia payam ve tiveleg gham, ghoru tinimim iza pa poia to Maaron to iza tiam. Pasa sawa tovene, Maaron Avuvu to ipatoon Maaron tapiri ve poia toni pait, pale ineeŋ kat toman gham.<sup>u</sup>

---

**o** 4:7 Ro 13:12+    **p** 4:8 Np 10:12; 1Kor 13:4+; Kol 3:14    **q** 4:9 Ro 12:13; Hib 13:2  
**r** 4:10 Ro 12:6+; 1Kor 12:7+; Ep 4:11+    **s** 4:12 Mbarj 14:22; 2Tim 3:12; 1Pe 1:6+  
**t** 4:13 Pil 3:10; Kol 1:24    **u** 4:14 Mt 5:11

<sup>15</sup>Eemoghon tiam eta irab tamtoghon imaat, iyub, isegeed saveeņ sorok, ma igham ngar samia ite paam malep. Pasa, ighaze agham ngar tovene ve tiņgal matamim pani, nene poia maau. [I]ngar tovene igham mayaniņa pa Krisi ve iwaghamun iza.] <sup>16</sup>Eemoghon ighaze yam ataghon Krisi ve ambaad pataņani pani, mayamim malep. Tinimim iza ve apait Maaron. Pasa, Krisi igham gham anim le wa. Tauto tiwaat iza payam tighaze yam Kristen.<sup>y</sup>

<sup>17</sup>Sawa to Maaron iņgabiiz tamtoghon toni ve ighur atia padi, tauto taza pani wa.<sup>w</sup>

Ve ye ighaze iņgabiiz ghiit muuņ. Le isob, ghoru iņgabiiz yes pida paam Aghita. Ighaze ye igham tovene pa iit tamtoghon toni, pale igham sa ngar pa yes to tizorzoor varu poia toni? <sup>18</sup>Maaron aliņa to timbooda, isaav tovene:

“Ataam to Maaron igham mulin ghiit, nene ipataņan kat pa ndiran deņjadi titaghoni.

Ighaze venen, pale vena pa ndiran samsamiadi to matadi iņgal Maaron rita maau? Pale sa ngar ivot padi?”<sup>x</sup>

<sup>19</sup>Tovenen ighaze Maaron lolo pa yam ambaad pataņani pa Krisi iza, yam aghur taumim ila ye nima, ve agham ngar poia irau sawa isob. Ye irau ipul muri payam maau. Pasa, ye to ighur gham, ve lolo ikis tamtoghon toni ariņa.<sup>y</sup>

### **Ŋginiņa irau tiņgin poian Maaron tamtoghon toni**

**5** <sup>1</sup>Yo, you naghaze napalot ŋginiņa tiam pa saveeņ pida. Pasa, you paam ŋginiņ nanimale yam. Ve pataņani to Krisi imbaada, taug naghita katini pa matag. Ve sawa to Krisi imuul inim ve ipatooņ tapiri ve iza tiina ivot ighazooņ, nene pale you paam itiņa taneep ila Krisi ŋguruba lolo. Tovenen yam ŋginiņa irau alooņ aliņag tonene, ve ataghoni.

<sup>2</sup>Maaron ighur uraat ilat nimamim wa ighaze aņgin sipsip toni. Tovenen matamim padi ve aņgin poian di. Uraat tiam tonanan, ighaze tamtoghon tizoorndug payam pa aghami, nene poia maau. Aghami toman lolomim, ghoru poia. Leso ataghon Maaron lolo. Ve agham ngar tiina pa lemim atia malep. Pasa ngar tovene, taghita poia maau.<sup>z</sup>

<sup>3</sup>Yes to Maaron ighur di tilat nimamim pa aņgin di, agham taumim anim tiina padi ve atatan di tizi malep. Yam taumim irau anim patoņaaņ poia

---

v 4:16 Mbaņ 5:41; Pil 1:29 w 4:17 Petrus ighita ighaze pataņani to yes Kristen timbaad di, nğara tovene: Aazne, Maaron iņgagabiiz tamtoghon toni. Ve ighaze ngar todi deņja maau, ye ipul pataņani ivot padi pa ipasalungan di. Leso sawa to Mboņ Muri ve gabizooņ tau ighaze ivot, yes pale tineep pooi. Eemoghon yes to tighur ila maau, ye ipul di tineep tovene le sawa to Mboņ Muri, ghoru iņgabiiz di ve ighur atia padi ve tilaledi.

x 4:18 Np 11:31 y 4:19 Mbo 31:5; Lu 23:46; Mbaņ 7:59 z 5:2 Yo 21:15+; Mbaņ 20:28; 1Tim 3:3; Tit 1:7

pa Maaron sipsip toni. Leso tighita gham, ve titaghon gham pa n̄gar tiam.<sup>a</sup>

<sup>4</sup>Ighaze agham tovene, sawa to Īginiin̄ tau to sipsip imuul inim, ve ipatoon̄ tapiri ve iza tiina ivot ighazoon̄, Maaron pale igham gham aneep ila tau n̄guruba lolo le alok inim lemim atia. Atia tovene, irau isami, ma isob ne maau.<sup>b</sup>

### Tatatan tauud izaad, ve taghur patañani toit ila Maaron nima

<sup>5</sup>Yam ndipain aneep ila n̄giniin̄a tiam sambadi, ve aloon̄ saveeñ todi. Ve yam asob irau atatan taumim izamim, ve ambees pooi pa taumim. Pasa, Maaron aliñ isaav tovene:

“Yes to tipait taudi izadi, Maaron ighurghur koi padi ve itatan di.

Ve yes to titatan taudi izadi, ye ighurghur poia toni izaza todi.”<sup>c</sup>

<sup>6</sup>Tovenen atatan taumim, ve aneep ila Maaron ariañ nima samba. Ighaze agham tovene, ye pale ipait gham ila sawa to ye tau ighuri.<sup>d</sup>

<sup>7</sup>Patañani tiam naol to lolomim imbumbu padi, aghur di tisob tila Maaron nima. Ye pale iuul gham. Pasa, ye igham n̄gar tiina payam ve mata payam.<sup>e</sup>

<sup>8</sup>Agham n̄gar pooi ve matamim iza. Pasa, koiamim Īgeu Samia ilaghlaagh inimale laion to itañtañ ve ikalkaal tamtoohon pa ighani.

<sup>9</sup>Tovenen akis ghurla tiam tun̄ja, ve aparab ariañ. Leso atatani. Pasa, yam awatag: Toñvetaz tiam to Krisi to tineep irau ndug ndug, timbaad patañani raraate inimale yam ambaada.<sup>f</sup>

### Saveeñ palotiin̄ pida

<sup>10</sup>Maaron toit to poia pughu, ye ipoi gham anim Krisi le, lesa igham gham ala aneep tomani ila n̄guruba lolo le alok. Patañani to aazne ambaada ne, mala maau pale isob. Ve muri, Maaron tau pale igham gham aneep poia muul ve ipalot gham, lesa ayoon tun̄ja ve akis ghurla tiam ariañ.<sup>g</sup>

<sup>11</sup>Ye ariañ, ve tapiri toman pooz toni, nene inepneep tovene irau sawa isob. Onoon.

### Paesiin̄ pida

<sup>12</sup>Silas iuul ghou pa bodeeñ rau tuku tonene. You naghita naghaze ye toñvetaz toit eez to lolo inep tun̄ja ila to Krisi ve tini imbees kat pa uraat toni. Nambood rau tonene ilat tiam pa napariaañ gham. Leso

---

**a** 5:3 2Kor 1:24; Pil 3:17; 1Tim 4:12; Tit 2:7    **b** 5:4 1Kor 9:25; 2Tim 4:8; 1Pe 1:4  
**c** 5:5 Mt 23:12; Yems 4:6    **d** 5:6 Lu 1:52, 14:11; Yems 4:10    **e** 5:7 Mbo 55:22; Mt 6:25+; Pil 4:6    **f** 5:9 Ep 4:27, 6:11+; 1Tes 5:6; Yems 4:7    **g** 5:10 2Kor 4:17; 1Pe 1:6

aghur ila aghaze poia to Maaron to nasavia ila rau tonene, nene mbeb tau. Tovenen akisi tunja.

<sup>13</sup>Nditamim to Maaron isia di tinim le tinimale yam ve tineep izi ndug tiina Babilon,<sup>h</sup>

tigham ndag poia todi ilat payam. Ve natug Markus paam, igham ndag poia toni payam.<sup>i</sup>

<sup>14</sup>Yam asob awakisin nimamim/  
itaghon ngar to lolood pa tauud.

Yam to aneep tunja ila to Kresi, Maaron pale igham gham asob aneep poia toman lolomim luuma. Onoon.<sup>k</sup>

---

**h 5:13** Petrus isavia saveej tonene iza to lupuuj eez to Kresi to tineep izi ndug tiina Rom.  
**i 5:13** Mbanj 12:12, 13:5,13; Mbanj 15:37+; 2Tim 4:11    **j 5:14** Petrus imbood saveej tovene: 'Aghan avomim itaghon ngar to lolood pa tauud.' Nene ataam todi to tipatoon tighaze lolodi pa taudi. Ve iit tagham tovene maau. Tayanjin pa tamtoghon, ve tawakisin nimaad.    **k 5:14** Ro 16:16